



Gabinete Wever - Croes II

# ISLAONLINE


Noticia di Gobierno

2023

Diaranson 22 November 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





Diamars 21 di November, a tuma luga den Parlamento di Aruba e reunion publico pa trata e Ley di Plan di Mayor. E ley a wordo aproba. Plan di Mayor ta un ley sumamente importante na bienestar general di nos muchanan cu ta stipula cu ora un pareha separa, nan mester yega na un plan con tur dos lo sigui ta parti di e bida di e muchanan. Esaki sigur ta algo hopi positivo pa nos comunidad pasobra despues di decision pa separacion, mayornan a base di e ley aki por dicidi hunto con pa sigui padilanti poniendo nan yiunan central.

“Un PABIEN y DANKI na e comision di Plan di Mayor, cu a wordo institui na 2019, pa nan aporte incondicional pa cu esaki a bira un realidad, bou guia incansable di Michella Steenvoorde Lacle. Un PABIEN y DANKI tambe na colega Minister Rocco Tjon pa su vision y perseverancia. Plan di Mayor ta un tremendo proyecto pa Aruba!,” Prome Minister Evelyn Wever-Croes a expresa.

#### E COMISION PLAN DI MAYOR TA CONSISTI DI:

1. Michella Steenvoorde- Lacle (Ministerio di Husticia y Asuntonan Social)



2. Bert Wielenga (Centro ortopedagogico)
3. Aisca Berkmeyer (Directie Voogdijraad)
4. Sacha Geerman (Directie Sociale Zaken)
5. Magaly Maduro (Bureau Sostenemi)
6. Sylvie Eman (Corte di Aruba)
7. Luc Alofs (Universidad di Aruba)
8. Desiree Helder (Centraal Bureau Statistiek)
9. Yvonne Bermudes (Centro di hoben y famia)





22 NOVEMBER  
2023

# FELIZ DIA DI MUSICO

-Prome Minister  
*Evelyn Wever-Croes*







# **MINISTER MADURO TABATA PRESENTE NA E "A-MAZE EXPERIENCE" EN CONEXION CU E CELEBRACION DI 65 AÑA DI CAS DI CULTURA**

Diabierna cu a pasa, den un evento cu a keda marca pa musica, alegria y celebracion, Minister di Cultura, Xiomara Maduro, tabata presente na e celebracion di e 65 aña di historia y legado cultural di e icono cu ta Cas di Cultura. E evento yama "A-Maze Experience - 65 Aña di Emocion", tabata un fusion unico di arte, teatro, historia y entretenimento, diseña pa celebra hunto cu socionan principal y amigonan di e plataforma aki.

Cas di Cultura, cu ta un centro di cultura y arte den nos comunidad desde cu e la wordo funda, a organisa un experiencia unico cu a hiba esnan presente den un viahe bek pa pasado. E "A-Maze Experience" tabata consisti di diferente presentacion artistico y exhibicion interactivo cu a destaca e logronan cultural di Cas di Cultura a lo largo di e ultimo 65 aña.

Minister Maduro, na final di e anochi aki a enfatisa e importancia di Cas di Cultura como un espacio pa preservacion y promocion di e identidad cultural di nos Pais. 'E "A-Maze Experience" no tabata solamente un celebracion di pasado, pero un inspiracion pa futuro di nos cultura y arte.'

Minister Maduro ta gradici Cas di Cultura y henter e ekipo pa nan papel importante den fomentacion di talento local y crecimiento di bida cultural di nos isla. E experiencia a termina cu un exhibicion special cu a laga esnan presente cu un aprecio profundo di e herencia cultural rico di nos Pais.

E aniversario aki no ta marca solamente un momento di celebracion, pero tambe un punto di reflexion riba futuro y evolucion continuo di Cas di Cultura, sigurando cu e sigui ta un pilar fundamental den e comunidad cultural di Aruba den e añanan cu ta bin.









**Departamento di Cultura:**

# **PABIEN NA TUR MUSICO DI ARUBA RIBA DIA DI SANTA CECILIA**

## **DI PARTI DI MINISTERIO DI CULTURA Y DEPARTAMENTO DI CULTURA ARUBA**



Despues di mas di 12 siglo di e morto di e martir romano, na aña 1594, Santa Cecilia a ser declara e patrona di musica y musicianan pa Papa Gregorio XIII. For di e tempo ey cu hopi forza y conviccion su figura tabata ser venera como e abogado di e musicianan y esaki a bin ta tuma lugar universalmente. Su fecha natal a ser adopta mundialmente como e dia di celebracion di musica y musicianan. Desde siglo XVII na varios paisnan di Europa a celebra e fecha aki cu festivalnan musical. E hoben Cecilia cual a ser martirisa den aña 230 a ser honra cu e Patrona di musica pa e storianan cu tabata ser conta den su martirio cu ta data di siglo V. Na momento di su morto e tabata canta na su unico Señor (Dios) mientras instrumentonan musical tabata zona y e tabata bisa: "inmacula mi curason y curpa", pues sin mancha y sin defecto.

Nos por admira riba e imagenan di Santa Cecilia den pleno alegria tocando instrumentonan musical den presencia di Señor. Papa Gregorio XIII a nombra Cecilia Partrona di tur musicianan pasobra el a sa di demostra un atraccion irresistible na su forma di interpreta melodianan y harmonia riba e instrumentonan. Su spirito sensible y apasiona pa e arte a haci cu a converti su nomber den un simbolo di musica.

E obhetivo principal di e dia aki no ta solamente pa pone atencion riba e importancia di e arte musical rond di mundo pero tambe pa promove e union, paz y amistad cu musica ta causa. Ta bon conoci cu e arte di musica ta kibra tur barera y ta trece union entre nacionnan.

Pesey awe Departamento di Cultura Aruba (DCA) cumpliendo cu su labornan

di documenta biografia di nos artistanan Arubano. A pone esakinan online via [www.coleccion.aw](http://www.coleccion.aw). Tambe DCA ta trahando pa finalisa cu e publicacion di e buki di 'Biografia di nos Artistanan Arubano'. Ademas DCA ta trahando den un cooperacion estrecho cu Arubaanse Muziek School (AMS) pa cu e educacion musical y ta sostene diferente proyecto di musica en general. Di parti di Ministerio di Cultura y DCA nos ta desea tur musico, cu ta crea y interpreta musica, masha pabien ariba e dia aki cu ta Dia di Santa Cecilia, Patrona di Musiconan. Danki pa aporta y contribui na e bunita forma di arte aki cu ta un parti esencial di e expresion musical di nos cultura.

Ministerio di Finansa y Cultura

22 di november 2023

# *Dia di Musica*

**Pabien na tur musico riba boso dia.**  
Danki pa deleita nos cu e idioma universal di musica.

**Xiomara Maduro**  
Minister di Finansa y Cultura

f i y | [xiomaramaduro.com](http://xiomaramaduro.com)





## A LANSA OFICIALMENTE E TOOLKIT DI CODIGO DI PROTECCION Y SU REVISTA

Dialuna anochi, riba dia internacional di derecho di mucha, a lansa oficialmente e toolkit pa loke taCodigo di Proteccion (CDP) y su revista. Un momento sumamente bunita, caminda a presencia e resultado di e dedicacion di e ekipo di CDP cu a haci esaki posibel. Ta trata di un plataforma digital caminda ta inverti den nos profesionalnan door di duna nan tools pa por eherce nan trabou mucho mas miho y garantisa proteccion pa nos muchanan.

E toolkit aki tin di haber cu e Codigo di Proteccion, pues awo a comberti den un proyecto mucho mas sostenibel y duradero. Importante pa menciona ta cu UNICEF Hulanda a aporta pa guia e trayecto aki, sin mas e contenido di e toolkit aki a wordo forma door di Departamento di Mucha y Hoben cu a lidera henter e proyecto. Tambe, a conta cu un grupo di trabou cu a percursa pa e contenido, consistiendo di 17 profesional di e cuater sectornan; husticia, social, salubridad publico y enseñansa. E grupo di trabou aki, a acerca alrededor di 70 profesional den e veldnan cu a percursa pa duna contenido na e toolkit aki.

Gobierno di Aruba ta percursa pa legislacion, maneho, procesonan di trabou pa asina por garantisa proteccion pa nos muchanan. Bisando esaki, un paso hopi importante ta inverti den nos profesionalnan cu mester haci e trabou aki, y a traves di e toolkit aki ta percursa pa tin inversion ta tuma luga continuamente den e profesionalnan a traves di “online



learning”, videonan, articulonan, preguntanan y respuesta, peer-to-peer brainstorming pa yega na ideanan nobo.

Ministerio di Husticia y Asuntonan Social ta sostene e proyecto aki y ta gradici cada profesional cu a percursa pa esaki por ta posibel. Un danki y un pabien na e ekipo completo di Codigo di Proteccion, Departamento di Mucha y Hoben, e 70 profesionalnan den e veld social, hudicial, salubridad publico y enseñansa. Tambe un danki na UNICEF Hulanda. ■





## MINISTER ENDY CROES A REUNI CU E STUDIANTENAN DI ARUBA CU TA EHERCE NAN ESTUDIO NA UNIVERSITY OF SOUTH CAROLINA

Despues di un siman basta intensivo y pisa di trabou na Merca, unda cu Minister Endy Croes a bishita varios universidad tanto na Washington, Maryland State y estado di South Carolina, Minister Endy Croes a topa cu seis (6) estudiante di Aruba cu actualmente ta eherciendo nan estudio na University of South Carolina. Durante e encuentro a intercambia idea y e studiantenan a comparti nan experiencia di estudio na University of South Carolina. Minister Endy Croes a enfatisa di por mira bek riba un tremendo siman di trabou, a logra firma un (1) MoU y dos (2) acuerdo cu University of South Carolina.



Nahib Barroso ta studiando operation Supply Chain and Finance na University of South Carolina. Nahib su conseho pa e studiantenan cu ta desea di studia na Merca ta scoge pa studia na University of South Carolina. E universidad tin un excelente “business program” y rank number tres (3) den Operation Supply Chain, number 1 den International Business y brinda asina hopi oportunidad na e studiantenan. Alan Kan ta studiando Finance and Accounting na University of South Carolina. Un conseho pa e studiantenan di Aruba cu ta desea di studia “business” na Merca ta pa studia na University of South Carolina e ta un “prestigious business school”.



Por ultimo, mandatario di Enseñansa a indica cu e tabata un placer pa dialoga cu e studiantenan y di por a scucha un poco di nan experiencia. Alabes Minister Endy Croes a enfatisa cu

e ta hopi orguyoso di nos yiunan di tera. Unabes cu finalisa nan estudio nan por regresa Aruba pa asina yuda nos sigui desaroya Pais Aruba cu e conocimiento cu nan ta adkeri na e universidad aki. Minister Endy Croes ta desea nan tur clase di exito cu nan estudio y nan futuro carera. ■■■



## MINISTER ENDY CROES TA GRADICI E ENTRENADONAN PA NAN CONTRIBUCION DEN E DESAROYO DI DEPORTE DI ARUBA



Recientemente, a tuma luga ceremonia di Premio Excelencia den Deporte unda cu a reconoce e atletanan cu mas a destaca den nan disciplina pa aña 2022. Un anochi magico yena cu emocion y alegria unda a honra e 130 atletanan nomina, a reconoce bintishete (27) entrenado pa nan contribucion den e desaroyo di deporte di Aruba. Tambe, a rindi homenahe na dies (10) baluarte deportivo cu a dedica gran parti di nan bida na desaroyo di deporte di Aruba. Banda di esaki, a reconoce seis (6) atleta olimpico cu a ricibi un certificado y pin di Olympians for Life (OLY) for di World Olympians Association pa nan esfuerzo y pa promove e balornan olimpico.

### E 27 entrenadonan cu a ricibi un reconocimiento special:

Aruba Paralympic committee  
Special Olympics Aruba  
Organizacion Caballista Arubano  
Aruba Triathlon Association  
Aruba Aquatics Federation  
Schaak Vereniging Aruba  
Aruba Tang Soo Do Federation  
Federation Gymnastico Arubano Artistica  
Aruba Athletic Federation  
Aruba Table Tennis Association  
Aruba Aquatics Federation Artistic Swimming  
Aruba Amateur Weightlifting Association  
Aruba Amateur Baseball Bond  
Arubaanse Voetball Bond  
Aruba Wieler Bond  
Aruba Taekwondo Association  
Aruba Volleyball Association  
Aruba Badminton Bond  
Aruba Little League  
Arubaanse Scherm Bond  
Aruba Bowling Association  
Muay Thai Kickboxing Association  
Aruba Domino Bond  
Febiar Aruba  
Aruba Sailing Association  
Aruba Bodybuilding&Powerlifting Association  
Federation Gymnastico Arubano Ritmica

Sr. Luciano Mazzeo  
Sra. Morela Rengel  
Sr. Gino Werleman  
Sr. Nicolaas Robert  
Sr. Ismael Santiesteban  
Sra. Carol Pesqueira  
Sra. Melissa Noguera  
Sr. Jimmy Palma  
Sr. Richard Luidens  
Sr. Rudy Raga  
Sra. Alva Torres  
Sr. Laertes Araque  
Sr. Guido Wever  
Sr. Juan Valdez  
Sr. Gregory Wouters  
Sr. Teofilo Rodriguez  
Sr. Percy Phelipa  
Sra. Su Ying  
Sr. Elwin Rincones  
Sra. Ezzedeane Vrolijk  
Sr. Christiaan Dammers  
Sr. Stacy Hassell  
Sr. Andy Farro  
Sr. Leonardo Gunnar  
Sr. Henze Verploeg  
Sr. Jonathan Wever  
Sra. Adriana Sevilla



Pa finalisa, Minister Endy Croes ta gradici e entrenadonan pa nan contribucion den e desaroyo di deporte di Aruba.



# MINISTER ENDY TA DESEA DI RECORDA TUR SCOL PREPARATORIO RIBA E CONCURSO DI KLEUR "STIMA BO MASCOTA 2023"

Desde aña 2020, e muchanan di scol preparatorio ta wordo inclui den e concursionan di pinta y kleur cu Gabinete Wever-Croes ta presenta. E concursionan aki tin como meta pa sigui conscientisa comunidad, specialmente nos muchanan cu nan mascota merece hopi amor y bon cuido.

E pintura cu e muchanan mester kleur ta un diseño di Sr. Armando Goedgedrag. Riba e pintura por mira un "oud Arubaans huisje", un tiki di Aruba su naturalesa y un veterinario cu dos (2) cacho, un (1) pushi y un (1) pisca rond di dje. Hasta por mira cu un di e cachonan recientemente a wordo opera: e tin su "cone" bisti pa e no por mishi cu su herida. Asina e muchanan ta wordo educa cu ta masha normal y hopi importante pa laga sterilisa un mascota, cual ta un manera pa yuda cu e poblacion descontrola di cacho y pushi cu tin actualmente na Aruba. E muchanan ta liber si

ta desea di pinta mas cos, por ehempel un cura, mas cadushi, mas nubia, etc.

Participacion ta gratis y ta habri pa tur mucha cu ta bay kleuter. Tur scol preparatorio a ricibi un e-mail cu e peticion pa participa. Minister Endy ta desea di subraya e peticion y ta recorda tur scol preparatorio cu e muchanan tin te dia 5 di december 2023 pa entrega nan formulario di participacion. Por entrega e formularionan di participacion na un di e siguiente luganan: MFANoord, MFAParadera, MFA Santa Cruz, MFA Savaneta, Oficina di Gobierno Edison Briesen na San Nicolas of na Bestuurkantoor Oranjestad. Lo tin premio pa "kleine" kleuter y pa "grote" kleuter, a base di nan edad (4, 5 y 6 aña di edad) y Minister di Enseñansa ta ripiti cu ta e esfuerzo di cada mucha ta conta.

## Informacion Participante

Number y Fam.....  
 Fecha di Nacimiento/Edad.....  
 Scol ..... Klas .....

# CONCURSO

## di kleur pa kleuter

  
Gobierno di Aruba



**participacion ta gratis** ★ **tin premio pa grote y kleine kleuter** ★ **ultimo dia di entrega ta dia 5 di december 2023**





**Minister Endy Croes:**

# **A INICIA CU TRAYECTO DI PREPARACION DI ALFABETISACION NA PAPIAMENTO PA TUR MAESTRO DI AÑA 1 Y CABESANTE DI SCOL BASICO**

Diabierna ultimo, a inicia e Trayecto di Preparacion pa Alfabetisacion na Papiamento na John F. Kennedy Education Center Aruba, cual tabatin un gran acogida. Esaki ta pa e implementacion di Alfabetisacion na Papiamento den cuadro di maneho di idioma nobo cu lo introduci e aña escolar benidero, cual ta basa riba recomendacion 2 di e rapport Doorlichting van het Arubaanse Onderwijsstelsel. Pues desde aña escolar 2024-2025, e alumnonan di klas 1 di scol basico lo siña lesa y skirbi na Papiamento. Lo duna Hulandes como idioma stranhero y acopla na loke e mucha por den Papiamento. E añanan despues lo sigui cu Papiamento y Hulandes como idioma stranhero den e siguiente klasnan di scol basico.

Pa esaki, alrededor di 50 maestro di klas 1 hunto cu 35 cabesante di scol basico na Aruba lo haya 6 dia di estudio durante e trayecto di preparacion cu a inicia november 2023 y lo culmina na mei 2024. Durante e prome encuentro por a observa e gran interes di e scol y directivanan di scol pa e proyecto aki. Esaki sigur ta un momento historico, mirando cu ya ta mas cu un siglo unda a indica cu un mucha mester siña, lesa y skirbi den su idioma materno y unda ciencia a prueba cu pa siña un idioma strahero manera Hulandes mester uza un didactica diferente. Mirando e contexto multilingual di Pais Aruba, e ta necesario pa nos muchanan forma un base fuerte di e idioma Papiamento (cu segun data di Censo ta e prome idioma of e idioma mas papia pa 80% di nos comunidad).

Cu e base fuerte aki, e muchanan por siña e otro idioma cu nan mester di dje den futuro na scol, den nos comunidad y den mercado laboral. Durante e trayecto di preparacion aki e maestro- y cabesantenan di scol basico lo haya oportunidad pa sigui un serie di les riba e plataforma digital di Matrix pa profesionalisa nan mes pa inicia cu Alfabetisacion di Papiamento otro aña augustus. Durante e lesnan nan lo trata: e metanan nucleo di idioma y comunicacion, conocimiento di e material, didactica di idioma materno y didactica di idioma stranhero y dominio di Papiamento. Minister Endy Croes ta gradicir e facilitadonan cu a contribui pa sostene e maestro- y cabesantenan di scol basico den e preparacion pa implementacion di Alfabetisacion na Papiamento na aña 2024. Hunto nos ta logra! ■■■■







Desaroyo y progreso di un pais ta mas  
sostinibel, fuerte y lihe ora cu cada  
ciudadano di e pais uni den esfuersonan  
y contribui cu positivismo na e vision  
pa logra cosnan grandi pa futuro.

2023 AÑA DI UNION Y POSITIVISMO! \_\_\_\_\_